



**EBAZPENA, 2016ko martxoaren 7koa, Hezkuntza sailburuordearena eta Lanbide Heziketako sailburuordearena, Euskal Autonomia Erkidegoko Derrigorrezko Bigarren Hezkuntzako, Batxilergoko eta Lanbide Heziketako ikastetxe publikoetan 2016-2017 ikasturterako eskola-egutegia egiteko osagarritzko arautegia ematen duena.**

Euskal Autonomia Erkidegoko ikastetxe publikoetako Derrigorrezko Bigarren Hezkuntzako, Batxilergoko eta Lanbide Heziketako 2016-2017 ikasturteko eskola-egutegiak, Oinarrizko Lanbide Heziketakoak barne, ondoko arauari jarraituko die:

1.- Ikastetxe publikoetako irakasle guztiak ikastetxera irailaren 1ean sartuko dira, 2016-2017 ikasturteko hasieraren jarduerak egiteko. Irakas-jarduerak ezingo dira 2016ko irailaren 7a baino lehen hasi. Lehenengo irakas-eguna 2016-2017 ikasturtearen aurkezpena egiteko erabili ahal izango da.

Beranduen jota ere, ekainaren 21ean bukatuko dira 2016-2017 ikasturtearen irakas-jarduerak, eta egun horretatik ekainaren 30era bitarte ondoko lanak burutuko dira: Derrigorrezko Bigarren Hezkuntzako aparteko deialdiko azterketak, ikasturtea aztertu eta ebaluatzeko berariazko lanak, programazioak, urteko memoria, eta egin beharreko administrazio ekintzak. Uztailean ikastetxeko zuzendaritza-taldeko kideek euren karguen zereginak bete beharko dituzte. Hilabete horretan eta klaseak ematen ez diren ikasturteko beste aldietan, (abuztuan salbu), zuzendaritza-taldeko kide bat, gutxienez, beti izango da ikastetxean edo berehala ikastetxean izateko moduan.

2.- **Derrigorrezko Bigarren Hezkuntzako** etapan ikasleek 1050 irakastordu jasoko dituzte gutxienez, 175 irakastegunetan banatuta. Aparteko deialdiko azterketak ikasturtearen azken irakastegunetik ekainaren 30era egingo dira, 175 eskola-egunak bete ondoren.

2016ko irailean eta 2017ko ekainean goizez bakarrik eskola guztiak emateko aukera izango da.

Aipatutako egunetan izan ezik, ikasturtean zehar goizez eta arratsaldeez emango dira eskolak; baina asteko arratsalde batean klaseak kendu ahal izango dira, irakaslearen prestakuntzarako iharduerak egiteko. Horretaz aparte, beste arratsalde batean ere eskolarik ez izatea erabaki dezake Ordezkaritza Organo Gorenak (OOG). Horretarako beharrezko izango da 2/3eko gehiengo koalifikatua, OOGn ordezkatuak dauden estamentu bakoitzean (gurasoak, ikasleak eta irakasleak). Eskolarik gabeko arratsaldeak direnak direla, ordutegiak egokitu egin beharko dira, asteko 30 eskola-saio eman ahal izateko.



Klaseak goizez eta arratsaldez ematen diren egunetan, eskola-orduak 6 klasez osaturik egongo dira. Klase bakoitzak ordubete iraungo du eta honela banatuko dira:

- Goizez: 4 klase, bakoitza 60 minutukoa, bi alditan banaturik eta 30 minutuko atsedenaldiraz bereizirik.

- Arratsaldez: 2 klase, bakoitza 60 minutukoa.

Bigarren Hezkuntzaren barruan Derrigorrezko Bigarren Hezkuntza besterik ematen en duten ikastetxeetan, etengabeko jarduneko egunetan 6 klase emango dira, guztiak iraupen berdinekoak eta bakoitza 50 minutukoa izango da gutxienez. Horrez gain, atsedenaldira bat edo gehiago egongo dira, eta guztira 30 minutuko atsedena bermatuko dute.

DBH eta Batxilergoa edo DBH eta Lanbide Heziketa irakasten dituzten ikastetxeek, bi etapetako ordutegiak koordinatu ahal izateko, honako aukera hau izango dute: klase-jardunen iraupena gutxienez 55 minutukoa izan, ikasturte osoan eta klase guztietan, goizeko jarduna dagoenean, ekaineko eta iraileko egunak barnean hartuta, zein goiz eta arratsaldeko jarduneko egunetan.

Edonola ere, ordutegiak doitu beharko dira, astean zenbait arratsalde libre izanik ere, edo klaseetako iraupena edozein izanik ere, tokian tokiko curriculumean aurreikusitako diren irakaskuntzako jardun guztiak bete daitezzen, baita ekainean eta irailean ere.

Ordutegiak ondoko baldintza hauek bete behar ditu:

a) Eskolak goizenez goizeko zortzietan hasiko dira, eta beranduenez goizeko 9etan.

b) Goizeko eta arratsaldeko saioen artean gutxienez ordu eta erdi iraungo duen atsedena bat egingo da.

c) Arratsaldeko eskolak beranduenez arratsaldeko bost eta erdietan amaituko dira.

d) Gehienez, hiru eskola-ordu emango da, jolasgarairik egin gabe.

e) Jolasgaraien denborak 15 minutuko iraupena izango dute gutxienez. Egun osoan zehar jolasgarai bakarra balego, 30 minutuko iraupena izango luke gutxienez.

3.- **Batxilergoko** etapan, ikasturteak gutxienez 175 irakastegun izango ditu, eta horietatik 160, gutxienez, benetako eskola egunak. Aurkezpena egiteko erabilitako eguna benetako eskola egun horien barruan sartu ahal izango da. 160 egun horietako bakar batean ere ezingo zaio eskola emateari utzi azterketak egiteko, ezta ebaluazio bilerak, klaustroak eta antzeko jarduerak egiteko ere.



Batxilergoko 1. kurtsoan asteko 34 klase-orduak emateko, asteko lau egunetan 7 klase-ordu emango dira eta beste egunean, berriz, 6 klase-ordu, eta aldezturik erabakiko da zein egunean zenbat ordu eman.

Batxilergoko 2. kurtsoan asteko 33 klase-orduak emateko, asteko bi egunetan 6 klase-ordu emango dira eta beste egun hirutan, berriz, 7 klase-ordu, eta aldezturik erabakiko da zein egunean zenbat ordu eman.

Bai 1. kurtsoan baita 2. kurtsoan ere klase guztiek 55 minutuko iraupena izango dute gutxienez.

4.- Batxilergoan 2016-2017 ikasturtearen ohiko klaseak maiatzaren 19an bukatuko dira; maiatzaren 22tik ekainaren azken irakastegunera bitartean, (biak barne), honako jarduerak egiteari ekingo zaio:

- Ohiko deialdiaren probak eta azken ebaluazioak egitea, notak ematea eta erreklamazioak erabakitzea.

- Selektibitateko azterketa eta ez-ohiko deialdiko probak prestatzeko eskolak ikasleei ematea. Ez-ohiko deialdiko probak prestatzeko eskoletan derrigor hartuko dute parte gainditu ez duten ikasleek, eta gainerakoek nahi badute. Edonola ere, bai eskola horien bidez, bai antolatuko daitezkeen beste eskola edo jarduerak alternatiboen bidez, ikastetxeek bermatu egin behar dute Batxilergoko bi mailetako ikasleek benetan, eta gutxienez, 2008ko martxoaren 10ko Aginduak zehazten dituen 160 eskola egun efektiboak izango dituztela.

- Ez ohiko deialdiaren probak eta azken ebaluazioak egitea, notak ematea eta erreklamazioak erabakitzea.

Ohiko eta ez ohiko deialdien probak eta azken ebaluazioak egiteko, notak emateko eta erreklamazioak erabakitzeko erabilitako egunak ez dira 160 benetako eskola egunen barruan sartuko, baina bai 175 ikasturtearen irakastegunen barruan.

5.- **Lanbide Heziketako** etapan, Oinarrizko Lanbide Heziketa barne, ikasturteak gutxienez 175 irakastegun izango ditu\*, eta horietatik 165, (33 aste), benetako eskola egunak. Aurkezpena egiteko erabilitako eguna benetako eskola egun horien barruan sartu ahal izango da. Eskola-saio guztiak 60 minutukoak izango dira, salbu Batxilergoko eta Lanbide Heziketako ordutegiak koordinatzeko dagokion egokitzapena egin behar denean, 7 eskola-saio ematen diren egunetan. 165 egun horietako bakar batean ere ezingo zaio eskola emateari utzi azterketak egiteko, ezta ebaluazio bilerak, klaustroak eta antzeko jarduerak egiteko ere.



\* 2000 ordu baino gutxiagoko iraupena duten Lanbide Heziketako Heziketa Zikloetan, lehenengo kurtsuak gutxienez 165 irakastegun izango ditu. Bigarren kurtsuak Heziketa Ziklo bakoitzeko iraupena kontutan hartuko da egutegia ezartzeko. Halaber, egutegiak bermatu behar izango du dagokion curriculum xedatzen duen arauak ezarritako ordutegi osoa ikasle guztiei ematea.

Nolanahi ere, ohiko deialdiko probak, azken ebaluazioak, erreklamazioak egin eta notak eman ekainaren 6a baino lehen egingo da; ez-ohiko deialdia, berriz, ekainaren 30a baino lehen.

Txandakako erregimenean eskaintako prestakuntza dualeko planetan ikasten dutenen jardueraren egutegia dagokion dokumentuak, kontratuak edo akordioak ezarritakoari lotuko zaio; dokumentu, kontratu edo akordiook planen oinarria dira eta erregelamenduz daude onartuta.

6. Hezkuntza-maila bakoitzaren azken ikasturtea amaitzeko egutegia finkatzerakoan, kontuan hartu beharko dira ondorengo irakaskuntzetara sartzeko prozeduretarako ezarri diren datak, ikasleek prozedura horietan parte hartzeko duten eskubidea bermatzeko

7. Ezinbesteko kasuren batengatik eskola ordu kopurua murriztuz gero, egutegia egokitu egingo da, ezarritako eskola egunak ematea lortzeko, beti ere langileen lan eskubideak errespetatuz.

Nahiz eta ikasleek –banaka zein taldeka- parte ez hartu, ikastetxeek eskolak eman egingo dituzte, ordutegi ofiziala errespetatuz.

Egutegia egokitu behar izanez gero, hasierako prozedura –egutegia finkatzeko erabilitakoa- bera erabiliko da, eta hori ez badu gobernu organo eskudunak egiten, Hezkuntzako Ikuskaritzak eskatuko du egutegia egoki dezaten. Eskaera horri erantzun ezean, Hezkuntzako Ikuskaritzak egokitu du egutegia eta ikastetxeari jakinaraziko dio.

8.- Eskola-egutegia egiteko, dagokion urteko Autonomia Erkidegoko lanegunetako jaiegunen egutegi ofizialaren arabera jaiegun izaera dutenak izango dira jaiegunak, baita herri edo dagokien lurraldeko zaindarien jaiegunak ere. Edonola ere ezin izango da jaiegun hauetakoren bat eskola-egun edo eskolak ematen diren egun bezala hartu.

Ikastetxeek, nahi izanez gero, jaieguntzat hartu ahal izango dute maila jakin bateko zaindariaren eguna, dagokion egunean zein aukeratzen duten ordezkaturako beste egun batean ospatuz. Halaber, nahi izanez gero, ikastetxean irakasten diren maila ezberdinen zaindarien jaieguna egun bakar batean ospatu ahal izango dute. Edonola ere ezin izango da jaiegun hori eskola-egun edo eskolak ematen diren egun bezala hartu.



9.- Eguberritako oporraldiak 2016ko abenduaren 24tik 2017ko urtarrilaren 6ra bitarteko aldia, gutxienez, hartuko du, bi egun horiek barne.

Aste Santuko oporraldiak, 2017ko apirilaren 13tik 17ra bitarteko aldia, gutxienez, hartuko du, bi egun horiek barne.

10.- Eskola egutegiaren proposamena tramitzeko 2008ko martxoaren 10ean Hezkuntza, Unibertsitate eta Ikerketa sailburuak emandako Aginduko 9. atalean ezarritakoari jarraituko zaio, (2008ko apirilaren 25eko EHAA).

2016ko ekainaren 1a baino lehen, ikastetxeetako zuzendariak hurrengo ikasturteko eskola-egutegiaren proposamena igorriko dute dagokien Hezkuntzako Lurralde Ordezkaritzara, eskuduna den gobernu-organoak hori onetsi zuen bilkurako aktaren kopia erantsiz.

Ikastetxeek, Hezkuntza, Hizkuntza Politika eta Kultura Sailak horretarako espresuki diseinaturiko aplikazio informatikoa erabiliz egin behar dute proposamena, beti ere Hezkuntzako Ikuskaritzak jakinaraziko dien argibideak jarraituz.

Egutegi proposamena ikastetxeko O.O.G.k egingo du, baina ikastetxeren batean organo hori osatu gabe badago, irakasleen klaustroak egingo du egutegi proposamena.

Zenbait ikastetxek, garraioa edo jangela konpartitzen dituztenek, egutegi proposamen bakarra eta berdina egingo dute, inplikaturiko ikastetxe guztietako ordezkariak organo gorenek onartuta.

11.- Ikastetxeren batek, finkatutako epealdiaren barruan beren eskola-egutegiaren proposamena bidaltzen ez badu, edo bidalitakoa onartzen ez bada, dagokion Hezkuntza Lurralde Ordezkariak egingakoa onartu behar izango du.

Vitoria-Gasteiz, 2016ko martxoaren 7a

HEZKUNTZA  
SAILBURUORDEA

LANBIDE HEZIKETAKO  
SAILBURUORDEA

Izp.: Arantza Aurrekoetxea Bilbao

Izp.: Jorge Arévalo Turrillas